



Broj: 01-50-1-15-31/08

Sarajevo, 18. juna 2008. godine

ZAPISNIK

31. sjednice Predstavničkog doma
Parlamentarne skupštine Bosne i Hercegovine,
održane 18. juna 2008. godine

Sjednica je počela u 10 sati. Prisustvovalo je 36 poslanika. Opravdano su, zbog službenog puta, odsustvovali: Šemsudin Mehmedović, Sadik Bahtić, Beriz Belkić, Zlatko Lagumdžija, Slavko Jovičić i Mirko Okolić (poslanici Bahtić, Mehmedović, Okolić i Jovičić došli su na sjednicu u 16,10 sati, pa su tako prisustvovali glasanju o razmatranim materijalima).

Iz Vijeća ministara BiH sjednici su prisustvovali ministri Tarik Sadović i Sredoje Nović, te zamjenici ministara Veselin Poljašević i Slavko Marin.

Iz međunarodnih organizacija prisustvovali su predstavnici OHR-a, OSCE-a, EUPM-a, te nevladine organizacije Centri civilnih inicijativa.

Sjednici su prisustvovali i predstavnici Centralne izborne komisije BiH zbog razmatranja njihovog Izvještaja o radu za 2007. godinu.

Nakon što je pozdravio prisutne, predsjedavajući Doma Niko Lozančić se sa nekoliko prigodnih rečenica obratio Domu u vezi s potpisivanjem Sporazuma o stabilizaciji i pridruživanju između Bosne i Hercegovine i Evropske unije, u Luksemburgu 16. juna 2008. Rekao je, uz ostalo, da izražava veliko zadovoljstvo što je i Predstavnički dom dao svoj veliki doprinos ispunjavanju uslova za potpisivanje ovog za BiH veoma značajnog sporazuma. Potpisivanjem Sporazuma Bosni i Hercegovini zagarantirano je mjesto u ujedinjenoj Evropi, ali u narednom periodu slijedi ispunjavanje svih uslova i standarda kako bi BiH i zvanično postala članica EU. Zato zadovoljstvo potpisivanja Sporazuma treba produžiti intenzivnim radom na izvršavanju obaveza kako bi u periodu koji je BiH Sporazumom određen ispunili sve uslove za članstvo u Evropskoj uniji, rekao je predsjedavajući Niko Lozančić u prigodnom obraćanju povodom potpisivanja Sporazuma o stabilizaciji i pridruživanju.

Zatim je predsjedavajući Lozančić iznio obrazloženje za izmjene i dopune prijedloga dnevnog reda koji su poslanici dobili u pozivu za sjednicu.

U raspravi o prijedlogu dnevnog reda Sadik Ahmetović predložio je dopunu uvrštavanjem prijedloga zaključka u vezi s rješavanjem pitanja decertificiranih policajaca, rekavši da će on u pisanoj formi dostaviti prijedlog zaključka.

Denis Bećirović predložio je da se u dnevni red uvrsti razmatranje pisma visokog predstavnika i specijalnog izaslanika EU u BiH Miroslava Lajčaka o štetnosti nacionalističke i antidržavne politike u procesu pridruživanja BiH Evropskoj uniji. U obrazloženju ove tačke rekao je, pored ostalog, da uz prijedlog dostavlja tekst pisma visokog predstavnika, kao materijal za raspravu o ovoj temi.

Bakir Izetbegović rekao je da se inicijativa Bećirovića može uklopiti u raspravu o Inicijativi poslanika Huseina Nanića sa 29. sjednice Doma, koja je na dnevnom redu ove sjednice, a koja glasi: "Zadužuje se Vijeće ministara BiH da uradi i Parlamentarnoj skupštini BiH dostavi informaciju o spremnosti institucija BiH za preuzimanje obaveza u vezi s primjenom SSP-a".

Povodom prijedloga Bećirovića u raspravi su učestvovali: Milorad Živković, Drago Kalabić, Martin Raguž, Jozo Križanović, Šefik Džaferović i Branko Dokić.

Poslije rasprave predsjedavajući je proveo glasanje o prijedlozima za dopunu dnevnog reda.

Prijedlog Sadika Ahmetovića usvojen je sa 25 glasova "za" (Federacija BiH 18, RS sedam) i šest "suzdržanih" – prijedlog zaključka uvršten je kao 12. tačka.

Prijedlog Denisa Bećirovića nije usvojen – "za" je glasalo sedam, "protiv" 12, "suzdržano" je bilo 14 poslanika.

Poslije glasanja o prijedlozima za dopunu, predsjedavajući Lozančić konstatirao je da 31. sjednica Predstavničkog doma ima sljedeći

D N E V N I R E D

1. Usvajanje zapisnika 29. i 30. sjednice Predstavničkog doma;
2. Poslanička pitanja i odgovori;
3. Zahtjev poslanika Momčila Novakovića za razmatranje Prijedloga zakona o izmjenama i dopunama Zakona o sukobu interesa u institucijama vlasti BiH po hitnom postupku, u skladu s članom 127. Poslovnika;
4. Prijedlog zakona o izmjenama i dopunama Zakona o policijskim službenicima BiH (drugo čitanje);
5. Prijedlog zakona o dopunama Zakona o upravnim sporovima (prvo čitanje);
6. Imenovanje tri člana u Zajedničku komisiju radi usaglašavanja Zakona o Fiskalnom vijeću BiH;
7. Izvještaj o radu Centralne izborne komisije BiH za 2007. godinu;
8. Prijedlog zaključaka Ustavnopravne komisije povodom rasprave o Informaciji o radu Tužilaštva BiH za 2007. godinu;
9. Prijedlog zaključaka Zajedničke komisije za ljudska prava, prava djeteta, mlade, imigraciju, izbjeglice, azil i etiku povodom razmatranja Informacije predsjedavajućeg Vijeća ministara BiH u vezi s radom Državne komisije za ispitivanje istine o stradanjima Srba, Hrvata, Bošnjaka, Jevreja i ostalih u Sarajevu u periodu od 1992. do 1995. godine;
10. Prijedlog zaključaka Zajedničke komisije za odbranu i sigurnost povodom rasprave o Informaciji o stanju sigurnosti u Bosni i Hercegovini za 2007. godinu;
11. Prijedlog zaključaka Komisije za saobraćaj i komunikacije povodom rasprave o poslovanju Javnog RTV servisa BiH i mjerama za prevladavanje stanja utvrđenog revizijskim izvještajima o finansijskom poslovanju Javnog RTV servisa BiH za 2005. i 2006. godinu;
12. Prijedlog zaključka Sadika Ahmetovića u vezi s decertificiranim policajcima;
13. Inicijativa poslanika Huseina Nanića sa 29. sjednice Doma koja glasi: ‘Zadužuje se Vijeće ministara BiH da uradi i Parlamentarnoj skupštini BiH dostavi informaciju o spremnosti institucija BiH za preuzimanje obaveza u vezi s primjenom SSP-a’;
14. Izvještaj komisije Kolegija o nastojanju za postizanje saglasnosti o:
 - a) Prijedlogu zaključka poslanika Sefera Halilovića sa nastavka 29. sjednice Doma, održane 4.6.2008., u vezi s identifikiranjem imovine bivših SKBiH, SSRN BiH, SSO BiH, SSBiH,
 - b) Prijedlogu zaključka Kluba poslanika SDA sa nastavka 29. sjednice Doma, održane 4.6.2008., u vezi s pripremom informacije o imovini bivših DPO (SK, SSRN i SSO),
 - c) Zahtjevu poslanika Rifata Dolića za uvrštavanje u dnevni red 30. sjednice Doma prijedloga zaključka o izradi i podnošenju informacije Vijeća ministara BiH o stanju i statusu imovine države, firmi i građana BiH u zemljama nastalim raspadom bivše SFRJ s planom aktivnosti na njenoj zaštiti i preuzimanju od strane legalnih vlasnika;
 - d) Zahtjevu poslanika Huseina Nanića da se u dnevni red 30. sjednice uvrsti razmatranje aktuelnog stanja u Nogometnom savezu BiH;
15. Promjene u članstvu komisija Doma i zajedničkih komisija oba doma (predlagači: klubovi poslanika)
16. Davanje saglasnosti za ratifikaciju:
 - a) Sporazuma između Bosne i Hercegovine i Republike Turske o izbjegavanju dvostrukog oporezivanja u odnosu na poreze na dohodak i imovinu,
 - b) Konvencije o zaštiti evropskih divljih vrsta i prirodnih staništa,
 - c) Sporazuma o kreditu između Bosne i Hercegovine i BAWAG P.S.K. - BANKA ZA RAD I PRIVREDU I AUSTRIJSKA POŠTANSKA ŠTEDIONICA D.D.– Projekat nabavke medicinske opreme za Kliničku bolnicu Mostar,
 - d) Sporazuma o kreditu između Bosne i Hercegovine i BAWAG P.S.K.– BANKA ZA RAD I PRIVREDU I AUSTRIJSKA POŠTANSKA ŠTEDIONICA D.D. - Projekat nabavke medicinske opreme za Dom zdravlja Mostar,

- e) Sporazuma o kreditu između Bosne i Hercegovine i BAWAG P.S.K. BANKA ZA RAD I PRIVREDU I AUSTRIJSKA POŠTANSKA ŠTEDIONICA D.D.– Projekat nabavke medicinske opreme za Kantonalnu bolnicu Safet Mujić, Mostar.

Ad. 1. Usvajanje zapisnika 29. i 30. sjednice Predstavničkog doma

O zapisnicima nije bilo rasprave.

Prilikom glasanja prihvaćen je prijedlog predsjedavajućeg da se istovremeno glasa o oba zapisnika.

Zapisnici su usvojeni sa 32 glasa "za" (Federacija BiH 19, RS 13) i jednim "suzdržanim".

Ad. 2. Poslanička pitanja i odgovori

Predsjedavajući je upoznao Dom da su odgovore na pitanja do ove sjednice dobili poslanici:

- Šemsudin Mehmedović – od Vijeća ministara BiH, na pitanje postavljeno na 20. sjednici;
- Husein Nanić – od Vijeća ministara BiH, na pitanje postavljeno na 21. sjednici;
- Na pitanja postavljena na 23. sjednici od Vijeća ministara BiH odgovore su dobili: Zlatko Lagumdžija, Sadik Ahmetović, Šemsudin Mehmedović, Rifat Dolić, Snježana Rajilić, Velimir Jukić, Mehmed Suljkanović i Sefer Halilović;
- Na pitanja postavljena na 26. sjednici od Vijeća ministara BiH odgovore su dobili: Husein Nanić, Denis Bećirović, Selim Bešlagić, Bajazit Jašarević, Azra Alajbegović, Adem Huskić i Sadik Ahmetović;
- Na dva pitanja postavljena na 28. sjednici odgovore od Vijeća ministara BiH dobio je Husein Nanić.

Odgovore na pitanja komentirali su Husein Nanić i Adem Huskić.

U okviru komentara na odgovor koji je od Vijeća ministara BiH dobio na pitanje: „Šta su Vijeće ministara BiH i Predsjedništvo BiH preduzeli u rješavanju spornih pitanja vezanih za vlasništvo i zaštitu interesa BiH u vezi s jadranskim naftovodom“, **Adem Huskić pokrenuo je inicijativu da se u dnevni red jedne od sjednica Doma uvrsti rasprava o pitanju imovine Bosne i Hercegovine, dodavši da ne insistira na hitnosti, ali da je potrebno dobro pripremiti materijal.**

Postavljena su nova pitanja kako slijedi:

Azra Alajbegović:

„Imam jedno pitanje za Ministarstvo civilnih poslova BiH za koje bih molila da se proslijedi i Međurektorskoj konferenciji a vezano je za tumačenje člana 28. Okvirnog zakona o visokom obrazovanju BiH.

1. Kako se precizira naučno djelo? U isto vrijeme pokrećem inicijativu da se naučno djelo adekvatno definira, te da se kao naučna djela tretiraju radovi s predznakom - revijalni članci, prikazi slučajeva, originalni članci...

2. U isto vrijeme pokrećem inicijativu da se naučna djela koja su objavljena tokom procedura izbora u zvanja tretiraju kao reference za izbor u zvanja! Radi se o radovima koji nisu bili reference za prethodna zvanja, te ti radovi nemaju adekvatnu poziciju u procesu napredovanja u zvanja!”

Rifat Dolić:

1. „Molbu upućujem Kolegiju Predstavničkog doma da uputi urgenciju ili požurnicu za dostavljanje odgovora na moja poslanička pitanja koja sam postavio na prethodnim sjednicama. Prema mojoj evidenciji, ja potražujem 14 ili 15 odgovora koja sam na ranijim sjednicama postavio različitim institucijama u BiH.“

2. “ Drugo pitanje postavljam ministru civilnih poslova BiH: Čija je nadležnost i šta resorno ministarstvo može preduzeti naštto na poboljšanju stanja i uvođenju više reda u liječenju građana BiH teško oboljelih od srčanih bolesti i još nekih oboljenja, čije uspješno liječenje je moguće u samo nekoliko bolnica ili klinika u BiH, a koji, čekajući red za operacije, zračenja i drugo, često umiru ili ulaze u stadij neizlječivosti?”

Husein Nanić:

1. “Nakon održane 8. zajedničke sjednice oba doma Parlamentarne skupštine BiH 23. aprila 2008., dakle prije skoro tri mjeseca, tražio sam preko sekretara Komisije za vanjske poslove od MVP-a da mi u elektronskoj formi dostavi materijal Ministarstva koji smo mi, poslanici, dobili u pisanoj formi, tj. **Informaciju o stanju u DKP mreži BiH** a radi lakše pripreme za raspravu koja treba uslijediti po zaključku Doma.

Do danas nisam dobio traženu elektronsku verziju niti ikakav odgovor od MVP-a.

Javno postavljam pitanje ministru vanjskih poslova BiH - zbog čega, i nakon urgencije, kao poslanik u ovom domu ne mogu dobiti navedenu informaciju?”

2. Postavljajući prethodno pitanje Nanić se osvrnuo se na veb-stranicu Parlamentarne skupštine BiH, rekavši da se može uočiti nekoliko značajnih nedostataka i da njen sadržaj ne odgovara stvarnom stanju i ne daje realne i potrebne podatke o radu i aktivnostima Parlamentarne skupštine BiH. Spomenuo je i svoj zahtjev, prilikom popunjavanja upitnika službi Parlamentarne skupštine BiH, da materijale dobiva i u elektronskoj formi. **„Ovih nekoliko pitanja ukazuju na potrebu izrade plana za kvalitetnije i bolje korištenje naprednih tehnologija i Interneta za bolje funkcioniranje Parlamentarne skupštine BiH, te stoga ukazujem na potrebu da se to učini“.**

Denis Bećirović:

Ministru vanjske trgovine i ekonomskih odnosa BiH postavio pitanje: “Koje konkretne mjere preduzimate s ciljem zaštite domaćih proizvođača pilećeg mesa u Bosni i Hercegovini?”

Bajazit Jašarević:

“Da li će Upravni odbor Uprave za indirektno oporezivanje u 2008. godini davati odobrenje i u kojem obimu za izmjene i dopune Zakona o porezu na dodatu vrijednost, za izmjene i dopune Zakona o carinskoj tarifi i za izmjene i dopune Zakona o akcizama? Odgovor na pitanje pomoći će da se smanji broj pokušaja izmjena navedenih zakona koji, u pravilu, završe na zahtjevu predlagača Upravnom odboru za davanje odobrenja.”

Branko Dokić:

“Da li je Vijeće ministara BiH donijelo odluku da se općinski i kantonalni javni emiteri privatiziraju? Da li je definiran rok za privatizaciju i ko je zadužen za izvršenje odluke? I, ako je donesena takva odluka, onda je sljedeće pitanje – zašto je RAK nije proveo svojim dozvolama, jer je on obavezan da provodi odluke Vijeća ministara BiH? „

Niko Lozančić:

„Postavljam pitanje direktno predsjedavajućem Vijeća ministara BiH i nekolicini ministara u Vijeću ministara BiH: Zašto je potrebna godina dana za izdavanje prvog biometrijskog pasoša, a oni koji su se malo interesirali znaju da je to jedan od ključnih uslova za liberalizaciju viznog režima za sve građane BiH i za, akobogda, ukidanje viza građanima BiH?“

Ad. 3. Zahtjev poslanika Momčila Novakovića za razmatranje Prijedloga zakona o izmjenama i dopunama Zakona o sukobu interesa u institucijama vlasti BiH po hitnom postupku, u skladu s članom 127. Poslovnika

Poslije uvodnih napomena predsjedavajućeg, Branko Dokić postavio je pitanje predlagaču Zakona – šta je suštinski novo u prijedlogu ovog zakona u odnosu na onaj koji je nedavno bio na Domu, kada je zaključeno da su potrebne korjenite promjene u Zakonu o sukobu interesa u institucijama vlasti Bosne i Hercegovine?

Momčilo Novaković podnio je Domu obrazloženje zahtjeva za hitni postupak kao i za Prijedlog zakona. Rekao je, uz ostalo, da je to tekst zakona koji je pripremila Interresorna radna grupa i da mu se činilo da je Dom olako i prebrzo odbio taj zakonski prijedlog, te da je izostavio amandman koji je usvojila Ustavna komisija, a nije ga mogla usvojiti jer je djelovao na član kojeg nije bilo u Prijedlogu zakona.

U raspravi su učestvovali: Milorad Živković, Momčilo Novaković, Šefik Džaferović, Drago Kalabić, Jozo Križanović i Branko Dokić.

Prilikom glasanja Dom je, sa 20 glasova "za" (Federacija BiH 15, RS pet), pet "protiv" i šest "suzdržanih", usvojio zahtjev za hitni postupak. Zatim je Dom usvojio i Zakon o izmjenama i dopunama Zakona o sukobu interesa u institucijama vlasti Bosne i Hercegovine. "Za" su glasala 23 poslanika (Federacija BiH 17, RS šest), "protiv" jedan, "suzdržalo" se devet.

Ad. 4. Prijedlog zakona o izmjenama i dopunama Zakona o policijskim službenicima BiH (drugo čitanje)

U uvodnim napomenama predsjedavajući je podsjetio na Izvještaj nadležne komisije, koja je konstatirala da ni u komisijskoj fazi nije bilo amandmana i da je Prijedlog zakona prihvatila u predloženom tekstu.

Momčilo Novaković pitao je predlagača Zakona da li se ovim zakonom pogoršava ili poboljšava položaj decertificiranih policajaca, kao i slični slučajevi koji se mogu pojaviti u budućnosti.

U ime predlagača Zakona, odgovorio je ministar sigurnosti BiH Tarik Sadović. Rekao je, uz ostalo, da je Prijedlog zakona iz ove tačke rezultat predsjedničke izjave Vijeća sigurnosti UN-a i njime se rješava problem decertificiranih policajaca u mjeri u kojoj je to bilo moguće te da ove odredbe znače korak naprijed u rješavanju njihovog postojećeg statusa.

U vezi s rješavanjem problema decertificiranih policajaca, pitanja su postavili i Drago Kalabić i Azra Alajbegović, na koja je također odgovorio ministar Sadović.

U raspravi su učestvovali Halid Genjac, Bakir Izetbegović i Drago Kalabić.

Prilikom glasanja Prijedlog zakona usvojen je sa 28 glasova "za" (Federacija BiH 15, RS 13) i pet "suzdržanih".

Ad. 5. Prijedlog zakona o dopunama Zakona o upravnim sporovima (prvo čitanje)

Kratke uvodne napomene dao je predsjedavajući Doma Niko Lozančić.

Nije bilo rasprave.

Prijedlog zakona usvojen je sa 28 glasova "za" (Federacija BiH 15, RS 13) i pet "suzdržanih".

Ad. 6. Imenovanje tri člana u Zajedničku komisiju radi usaglašavanja Zakona o Fiskalnom vijeću BiH

U Zajedničku komisiju imenovani su: Lazar Prodanović, Bajazit Jašarević i Velimir Jukić. "Za" je glasalo 29 (Federacija BiH 16, RS 13), "protiv" jedan, "suzdržana" su bila tri poslanika.

Ad. 7. Izvještaj o radu Centralne izborne komisije BiH za 2007.godinu

Predsjedavajući Lozančić podsjetio je poslanike na Mišljenje Ustavnopravne komisije o Izvještaju Centralne izborne komisije BiH i zaključak koji Komisija predlaže Domu na usvajanje.

Stjepan Mikić je, u ime Centralne izborne komisije BiH, obrazložio Izvještaj o radu.

Nije bilo rasprave.

Sa 29 glasova "za" (Federacija BiH 16, RS 13), jednim "protiv" i tri "suzdržana", usvojen je Izvještaj Centralne izborne komisije BiH i Mišljenje Ustavnopravne komisije, sa sljedećim zaključkom:

Svi nadležni organi dužni su preduzeti sve aktivnosti iz svoje nadležnosti radi realiziranja preporuke Centralne izborne komisije BiH, navedene u Izvještaju Komisije u dijelu „Zaključna razmatranja i preporuke“.

Ad .8. Prijedlog zaključaka Ustavnopravne komisije povodom rasprave o Informaciji o radu Tužilaštva BiH za 2007. godinu

U uvodnim napomenama predsjedavajući je podsjetio da je Ustavnopravna komisija, izvršavajući zaključak Doma sa 26. sjednice, predložila Domu modificiran zaključak koji je Momčilo Novaković predložio u raspravi o Informaciji o radu Tužilaštva BiH.

U raspravi su učestvovali Bakir Izetbegović i Momčilo Novaković.

Bakir Izetbegović predložio je izmjenu zaključka koji je predložila Komisija, pa je u pisanoj formi predao svoj prijedlog zaključka.

Prvo se glasalo o zaključku koji je predložila Komisija. Sa 22 glasa "za" (Federacija BiH 10, RS 12), osam "protiv" i tri "suzdržana", usvojen je sljedeći zaključak:

Predstavnički dom Parlamentarne skupštine BiH traži od Vijeća ministara BiH da najhitnije donese strategiju i kriterije o prioritetima u procesuiranju predmeta krivičnih djela ratnog zločina.

Bakir Izetbegović predložio je sljedeći zaključak:

„Zadužuje se Vijeće ministara BiH da Parlamentarnoj skupštini BiH predloži strategiju za efikasno rješavanje predmeta ratnih zločina“.

Predsjedavajući je pozvao Dom da se izjasni o prijedlogu ovog zaključka. Međutim, Momčilo Novaković iznio je poslovničku intervenciju, rekavši da je Izetbegovićev zaključak naslovljen na Informaciju o radu Tužilaštva BiH, a na ovoj sjednici raspravljalo se o prijedlogu zaključka Ustavnopravne komisije povodom rasprave o Informaciji o radu Tužilaštva za 2007. godinu.

Predsjedavajući Lozančić prihvatio je poslovničku intervenciju i nije se glasalo o prijedlogu zaključka Bakira Izetbegovića.

Ad. 9. Prijedlog zaključaka Zajedničke komisije za ljudska prava, prava djeteta, mlade, imigraciju, izbjeglice, azil i etiku povodom razmatranja Informacije predsjedavajućeg Vijeća ministara BiH u vezi s radom Državne komisije za ispitivanje istine o stradanjima Srba, Hrvata, Bošnjaka, Jevreja i ostalih u Sarajevu u periodu od 1992. do 1995. godine

Predsjedavajući je podsjetio poslanike na zaključak Doma sa 24. sjednice koji je izvršila Zajednička komisija za ljudska prava i Domu podnijela prijedlog zaključaka u dvije tačke.

Nije bilo rasprave.

Prilikom glasanja, sa 31 glasom "za" (Federacija BiH 20, RS 11) i dva "suzdržana", na prijedlog Zajedničke komisije, usvojeni su sljedeći zaključci:

1. Obavezuje se Državna komisija za ispitivanje istine o stradanjima Srba, Hrvata, Bošnjaka, Jevreja i ostalih u Sarajevu u periodu od 1992. do 1995. godine, koja je imenovana na 121. sjednici Vijeća ministara BiH, održanoj 15.6.2006., da podnese finansijski izvještaj i izvještaj o radu.

2. Predlaže se Vijeću ministara BiH da donese novu odluku o osnivanju komisije za ispitivanje istine o stradanjima Srba, Hrvata, Bošnjaka, Jevreja i ostalih u Sarajevu u periodu od 1992. do 1995. godine, u skladu s preporukom broj 05-07-613/25-06, koja je donesena na 126. sjednici Vijeća ministara BiH, održanoj 3.8.2006.

Ad.10. Prijedlog zaključaka Zajedničke komisije za odbranu i sigurnost povodom rasprave o Informaciji o stanju sigurnosti u Bosni i Hercegovini za 2007. godinu

U uvodnim napomenama predsjedavajući je podsjetio na zaključke koje je predložila Zajednička komisija za odbranu i sigurnost, te na prijedlog dopune zaključaka koji je podnijela poslanik Mirjana Malić.

Mirjana Malić u raspravi je objasnila svoj prijedlog dopune zaključaka.

U raspravi su učestvovali: Adem Huskić, Salko Sokolović, Niko Lozančić, Drago Kalabić, ministar Tarik Sadović i Momčilo Novaković.

Prilikom glasanja, sa 29 glasova "za" (Federacija BiH 16, RS 13) i dva "suzdržana", usvojeni su zaključci koje je predložila Zajednička komisija za odbranu i sigurnost, a koji glase:

1. Predstavnički dom PSBiH zahtijeva od Ministarstva sigurnosti BiH i Vijeća ministara BiH da u narednih 60 dana dostave jasan i precizan prijedlog mjera i radnji za poboljšanje ukupne sigurnosne situacije u BiH, s jasnim nosiocima aktivnosti i rokovima, što uključuje zakonodavne, izvršne i sudske aktivnosti, institucionalnu i kadrovsku osposobljenost sigurnosnih struktura i mehanizama za odgovorno suočavanje sa svim sigurnosnim rizicima i prijetnjama u BiH.

2. Od Ministarstva sigurnosti BiH traži se ažuriranje i argumentirana dopuna ocjena i viđenja u informacijama o stanju sigurnosti na osnovu rasprava i prijedloga podnesenih povodom navedene tačke dnevnog reda na sjednici Predstavničkog doma.

3. Prilikom izrade narednih informacija o stanju sigurnosti u BiH, Ministarstvo sigurnosti BiH treba primijeniti novu metodologiju izrade, čije osnovne sadržajne elemente utvrđuje, prije svega, Sigurnosna politika BiH, pri čemu informacija treba biti jasna i rađena jedinstvenom komparativnom metodom.

4. Prilikom izrade naredne informacije, Ministarstvo sigurnosti BiH treba utvrditi listu sigurnosnih prioriteta u BiH, te sačiniti prijedlog njihovog rješavanja za određeni period, kako bi Parlamentarna skupština BiH mogla kontrolirati proces njihovog rješavanja. Zajednička komisija za odbranu i sigurnost BiH i PSBiH pružit će potrebnu podršku Ministarstvu sigurnosti BiH prilikom izrade kompletne informacije u dijelu koji se odnosi na potrebu intenziviranja saradnje svih institucija BiH i subjekata koji treba da učestvuju u njoj izradi.

5. Prilikom izrade naredne informacije, Ministarstvo sigurnosti BiH treba detaljno obraditi i pitanje korupcije i organiziranog kriminala u BiH, te predložiti mjere i radnje za borbu protiv takvog djelovanja.

6. S obzirom da je organizirani kriminal jedan od sigurnosnih prioriteta, neophodno je da Vijeće ministara BiH u roku od 30 dana formira državno tijelo za nadzor nad provođenjem Strategije i Akcionog plana za borbu protiv organiziranog kriminala i korupcije BiH. Ovo tijelo bit će obavezno da svaka tri mjeseca informira PSBiH o realiziranju mjera iz navedenog akcionog plana.

7. Neophodno je da Vijeće ministara BiH što prije u parlamentarnu proceduru dostavi zakonske propise na nivou BiH o transportu i osiguranju većih količina novca i vrijednosnih papira, te zakonski okvir s institucionalnim kapacitetima za borbu protiv automafije. Također, potrebno je otkloniti uočene slabosti u zakonskim propisima iz oblasti sigurnosti uopće, kako bi se postojeće stanje poboljšalo.

8. Radi stvaranja boljih uslova za rad agencija za provođenje zakona u BiH, a time i boljeg sigurnosnog okruženja, treba razmotriti raspoložive mogućnosti za njihov smještaj u neperspektivne vojne objekte, te insistirati na što kraćem roku reguliranja pitanja prijenosa vlasništva nad njima.

9. Obavezuje se Zajednička komisija da organizira poseban sastanak s ministrom sigurnosti BiH i njegovim zamjenikom, te direktorima sigurnosnih agencija BiH, uključujući i direktora BHMAC-a, radi sagledavanja problema navedenih u Informaciji o stanju sigurnosti i predlaganja određenih mjera za njihovo prevazilaženje.

Ad. 11. Prijedlog zaključaka Komisije za saobraćaj i komunikacije povodom rasprave o poslovanju Javnog RTV servisa BiH i mjerama za prevladavanje stanja utvrđenog revizijskim izvještajima o finansijskom poslovanju Javnog RTV servisa BiH za 2005. i 2006. godinu

Poslije uvodnih napomena predsjedavajućeg Doma, Branko Dokić je, u ime Komisije, obrazložio prijedlog zaključaka.

U raspravi su učestvovali: Šefik Džaferović, Azra Hadžiahmetović, Drago Kalabić, Branko Dokić, Jozo Križanović, Jerko Ivanković Lijanović, Velimir Jukić i Husein Nanić.

Primjedbe i amandmane na prijedlog zaključaka Komisije podnijeli su Šefik Džaferović i Azra Hadžiahmetović, a Velimir Jukić predložio je dodatni zaključak.

Prilikom glasanja Drago Kalabić predložio je da se odgodi glasanje o zaključcima Komisije, s obzirom na veći broj primjedbi, te da se to ponovo vrati Komisiji.

Predsjedavajući je konstatirao da je iznesen konkretan prijedlog da se odgodi izjašnjavanje o prijedlozima zaključaka iz ove tačke, te da se vrata Komisiji da pokuša naći rješenje i novi kompromis.

Ovaj prijedlog usvojen je sa 26 glasova "za" (Federacija BiH 17, RS devet), tri "protiv" i četiri "suzdržana".

Ad .12. Prijedlog zaključka Sadika Ahmetovića u vezi s decertificiranim policajcima

Poslije kratkih uvodnih napomena predsjedavajućeg, u raspravi su učestvovali: Drago Kalabić, Momčilo Novaković, Remzija Kadrić, Bakir Izetbegović, Adem Huskić, Milorad Živković, Niko Lozančić, Ekrem Ajanović, Šefik Džaferović i Jozo Križanović.

Poslanik Ahmetović predložio je sljedeći zaključak:

„Predstavnički dom Parlamentarne skupštine BiH zadužuje Vijeće ministara BiH da održi hitnu sjednicu s ciljem razmatranja zahtjeva decertificiranih policajaca, te o tome obavijesti ovaj dom.“

Prilikom glasanja prijedlog ovog zaključka nije dobio entitetsku većinu. "Za" su glasala 22 (Federacija BiH 20, RS dva) a "suzdržano" je bilo 12 poslanika.

Predsjedavajući je konstatirao da će se o prijedlogu zaključka provesti usaglašavanje.

Ad.13. Inicijativa poslanika Huseina Nanića sa 29. sjednice Doma koja glasi: ‘‘Zadužuje se Vijeće ministara BiH da uradi i Parlamentarnoj skupštini BiH dostavi informaciju o spremnosti institucija BiH za preuzimanje obaveza u vezi s primjenom SSP-a’’

U uvodnim napomenama predsjedavajući Lozančić podsjetio je da je Inicijativu poslanika Nanića razmatrala Zajednička komisija za evropske integracije i usvojila zaključak kojim je podržava.

Husein Nanić kratko je obrazložio svoju inicijativu.

U okviru ove tačke u raspravi su učestvovali: Halid Genjac, Momčilo Novaković, Denis Bećirović, Jozo Križanović, Jerko Ivanković Lijanović, Husein Nanić, Velimir Jukić, Remzija Kadrić, Šefik Džaferović i Azra Hadžiahmetović.

Sa 31 glasom "za" (Federacija BiH 18, RS 13) i jednim "suzdržanim", usvojena je inicijativa poslanika Huseina Nanića u formi zaključka koji glasi:

Zadužuje se Vijeće ministara BiH da izradi i u što je moguće kraćem roku, a najkasnije za 45 dana, dostavi Parlamentarnoj skupštini BiH informacije o spremnosti institucija Bosne i Hercegovine za preuzimanje obaveza u vezi s primjenom Sporazuma o stabilizaciji i pridruživanju.

Ad .14. Izvještaj komisije Kolegija o nastojanju za postizanje saglasnosti o:

- a) Prijedlogu zaključka poslanika Sefera Halilovića sa nastavka 29. sjednice Doma, održane 4.6.2008., u vezi s identifikiranjem imovine bivših SKBiH, SSRNBiH, SSO BiH, SSBiH,
- b) Prijedlogu zaključka Kluba poslanika SDA sa nastavka 29. sjednice Doma, održane 4.6.2008., u vezi s pripremom informacije o imovini bivših DPO (SK, SSRN i SSO),
- c) Zahtjevu poslanika Rifata Dolića za uvrštavanje u dnevni red 30. sjednice Doma prijedloga zaključka o izradi i podnošenju informacije Vijeća ministara BiH o stanju i statusu imovine države, firmi i građana BiH u zemljama nastalim raspadom bivše SFRJ s planom aktivnosti na njenoj zaštiti i preuzimanju od strane legalnih vlasnika;
- d) Zahtjevu poslanika Huseina Nanića da se u dnevni red 30. sjednice uvrsti razmatranje aktuelnog stanja u Nogometnom savezu BiH.

Predsjedavajući je podsjetio na izvještaje komisije Kolegija o usaglašavanju dodajući da nije postignuta saglasnost o zaključcima i zahtjevima iz ove tačke, te da će se o ovim pitanjima odlučiti u drugom krugu glasanja.

Prilikom glasanja u drugom krugu rezultati su bili sljedeći:

- Prijedlog zaključka pod a) nije usvojen: "za" glasalo 18, "protiv" 13 (iz RS-a 10), "suzdržana" dva poslanika.
- Prijedlog zaključka pod b) također nije usvojen: "za" glasao 21, "protiv" 12 (iz RS-a 10), "suzdržana" dva poslanika.
- Zahatjev poslanika Dolića pod c) je usvojen. "Za" glasalo 18, "protiv" 10 (iz RS-a sedam), "suzdržano" sedam poslanika.
- Zahtjev poslanika Huseina Nanića pod d) nije usvojen. "Za" glasalo 17, "protiv" 15 (iz RS-a 11), "suzdržana" dva poslanika.

Ad.15. Promjene u članstvu komisija Doma i zajedničkih komisija oba doma
(predlagači: klubovi poslanika)

Predsjedavajući Lozančić iznio je prijedloge koje su za promjene u komisijama podnijeli Klub Stranke za BiH, Klub SDP-a, Klub SDA i Klub SDS-a.

Prilikom glasanja Vinko Zorić i Mirko Okolić iznijeli su primjedbu da se predloženim izmjenama narušava entitetska zastupljenost u komisijama, propisana Poslovníkom. Iznesen je prijedlog da se izjašnjavanje odgodi, a da predlagači promjena do sljedeće sjednice razmotre usklađenost svojih prijedloga s odredbama Poslovníka.

Sa 31 glasom "za" (Federacija BiH 19, RS 12) i tri "suzdržana", usvojen je ovaj prijedlog.

Ad. 16. Davanje saglasnosti za ratifikaciju:

- a) Sporazuma između Bosne i Hercegovine i Republike Turske o izbjegavanju dvostrukog oporezivanja u odnosu na poreze na dohodak i imovinu,
- b) Konvencije o zaštiti evropskih divljih vrsta i prirodnih staništa,
- c) Sporazuma o kreditu između Bosne i Hercegovine i BAWAG P.S.K. - BANKA ZA RAD I PRIVREDU I AUSTRIJSKA POŠTANSKA ŠTEDIONICA D.D.– Projekat nabavke medicinske opreme za Kliničku bolnicu Mostar,
- d) Sporazuma o kreditu između Bosne i Hercegovine i BAWAG P.S.K.– BANKA ZA RAD I PRIVREDU I AUSTRIJSKA POŠTANSKA ŠTEDIONICA D.D. - Projekat nabavke medicinske opreme za Dom zdravlja Mostar,
- e) Sporazuma o kreditu između Bosne i Hercegovine i BAWAG P.S.K. BANKA ZA RAD I PRIVREDU I AUSTRIJSKA POŠTANSKA ŠTEDIONICA D.D.– Projekt nabavke medicinske opreme za Kantonalnu bolnicu Safet Mujić, Mostar.

Predsjedavajući je podsjetio da je Komisija za vanjske poslove razmatrala akte iz ove tačke i dala pozitivno mišljenje. Prredložio je da se rasprava o ovim materijalima objedini. Nije bilo prigovora na ovaj prijedlog.

Nije bilo rasprave u okviru ove tačke.

Dom je prihvatio prijedlog da se o svim materijalima iz ove tačke glasa u paketu.

Sa 33 glasa "za" (Federacija BiH 20, RS 13) i dva "suzdržana", Dom je dao saglasnost za ratifikaciju sporazuma i Konvencije iz ove tačke.

Ovim je realiziran dnevni red 31. sjednice.

Sjednica je završena u 17,35 sati.

Sastavni dio Zapisnika je transkript sjednice.

SEKRETAR
PREDSTAVNIČKOG DOMA
Branka Todorović

PREDSJEDAVALJUĆI
PREDSTAVNIČKOG DOMA
Niko Lozančić